

Sa vida
su martiriu et i sa morte
de sos gloriosos martires
Gavinu, Brothu et Januariu
cumposta
peri su multu magnificu reverendu et egregiu
Hieronimu Araolla tataresu
doctore in ambas leges
et canonigu bosanense cum sa prebenda
de Putumajore

1.

Sa Vida, su Martiriu, et cruda morte
De sos tres gloriosos advocados,
Qui triumphant como in sa celeste corte,
Pro su qui inoghe istetint tormentados
Si mi dat logu su Pianeta, et Sorte,
Qui sos ispiertos m'istent sussegados,
Promitto in rima octava de contare
De Gavinu, de Brothu, et Januare.

2.

Nasquer non podet da' me cosa alcuna
Digna de laude senza su favore
Tou, Re, totu a quie su Sole, et luna
S'inclinant sende d'ipsos su Factore;
Concedemi in sas ateras cust'una,
Qui conosca de Te gratia, Signore,
Qui tesse custa tela in nov'istilu
Quale requirit deligadu filu.

3.

Et s'in sas almas fagher movimentu
Dêst custa sanct' Historia lacrimosa,
Si dent ad Tie principiu et fundamentu
Sas gratias in su Mundu d'ogni cosa,
Qui senza Te nessunu intendimentu
Podet, nen limba fagher versu o prosa;
Però snodala Tue, et s'intellectu
Avviva quant' est altu su subjectu.

4.

In su tempus qui a Caju inthronizaint,
Et in suprema Sedia lu setisint;
Sos duos Tirannos perfidos regnaint

Qui tantu a sos Christianos persighisint,
Edictos qui accusarent, publicaint
In sos logos et regnos qui intendisint
Viver quale si siat sorte de gente
Qui adorant a Christu Omnipotente.

5.
Non istetit sa Sedia persighida
De Pedru mai in sos passados annos,
Nen tantu conculcada et opprimida
In flagellos, angustias, et affannos.
Quant' istetit durendelis sa vida
In su governu ai custos duos tirannos,
Qui desint morte pro ponner terrore
D'Eutechiu a Caju Sanctu successore.

6.
Et pro mezu is usare de sas suas
Damnadas intentiones, Diocletianu
Divisit su imperiu in partes duas
Cum su collega sou Maximianu:
Divisu, cominzaint sas impias, cruas
Manos ad ispargher samben christianu,
S' unu in Levante, et s' ateru in Ponente
Cum istratios de ferru, et fogu ardente.

7.
Parente istrictu fuit Diocletianu
De su nadu in Dalmatia, Dalmateu
Caju Sanctu Pontifice Christianu
Humile Seevu de Servos de Deu ;
Su pius crudele perfidu inhumanu
Non fit mai vistu Arabicu, o Judeu,
Non pius superbia Lucifer hapisit
Quando de Chelu in tenebras ruisit.

8.
Su primu qui si fectit adorare
In Terra send' alzada Imperadore,
Et qui fectit su mundu attribulare,
Et posil tot' in gherras et rumore,
Su qui fectit adflitos sempre istare
Sos Fideles de Christu cum timore ,
Custu est de vile, et basciu naschimentu,
Mas d' un' altu et sublime intendimentu.

9.
Subra sos octo curriant sos noranta

Senza dughentos ab Incarnatione,
Qui su mundu curriat fortuna tanta
Segundu de sos pius sa opinione;
Quando s'istracca trabagliada et Sancta
Barca tenzesit sa persecutione
Decima sa pius cruda, et pius notada
Qu' esseret in sas ateras istada.

10.
Et pro eseguire quant' hant decretadu,
Ispidint pro sos Regnos regidores,
In Corsica et Sardigna est nominadu
Barbaru dai sos duos Imperadores;
Et cum literas cuddu admonestadu,
Qui cum tormentos varios et dolores
De cuddos extirparet sa Christiana
Gente, et sola regnaret sa pagana.

11.
Custu Barbaru fuit dispossedidu
De su reamen propriu, et discazzadu
Dai sos Tirannos duos, qui hant removidu
Totu su mundu in giru, et inquietadu:
D' Africa pro sa Curia s' est partidu
Inue parizzos annos est istadu
Cum supplicas tentende multu a ispissu
D'essere in su reamen sou remissu.

12.
Mas non potisit mai cust'Africanu
Revocare cum supplicas s'intentu
De su tirannizadu impiu Romanu
Imperiu, causa d'ogni perdimentu:
A su fine li dait sa istricta manu
In ricompensa unu tractenimenlu,
De Corsica et Sardigna Presidente
Factendelu constare per patente.

13.
In ue li dant podere et forza tanta
Quanta est sa propria ipsoro, pro destruer
Su vexillu de Christu, et fide sancta;
Et in sa falsa sua fagherlos ruer:
Gasi custa idolatra infida pianta
Si partit pro tagliare, et samben suer
De sos servos de Christu, sas persones
Cum crudeles martirios et passiones.

14.

Jompidu su crudele, et inhumanu
Ad s'insula de Corsiga, jamadu
Dai sos antigos Portu Sergusanu
In ue Bonifaciu hoe est fundadu:
De cudd' havende sa potentia in manu
Istetit bene vistu et carezzadu,
Et tensit ivi algunos dies corte
Ordinde ad sos christianos cruda morte.

15.

Dae Corsiga in Sardigna incontinente
S' ischit sa nova, et de sos Turritanos
S' imbarcat grande numeru de gente,
Qu' assora totu fuint meros paganos;
Pro visitare ai custu Presidente .
Mandadu da' s'Imperiu de Romanos,
Et ipsos pro mustraresi fideles
Vassallos, ad sos impios et crudeles.

16.

A tie, li narrant, cum tantos honores
Mandadu, inoghe pro nos guvernare,
Da' sos potentes duos Imperadores,
Et s'idolatra Lege conservare;
Peri sos bandos pienes de terrores
Tra nois hamus ìntesu publicare
Custas dies, et narrer ti querimus
Su qui contra de cuddos totu ischimus.

17.

Retirados si sunt in Monte Agellu,
In pro' de sa Citade Turritana
Nostra, unu bezzu, et ateru pius bellu
Qui in chelu non adparet sa Diana;
Custos sunt veramente unu martellu,
Unu tarlu continu, una quartana,
Qui martellant et rodent tota via
Contra s' antiga nostra Idolatria.

18.

Su bezzu est unu grande seductore,
Et narrat a su publicu qui erramus;
Qui solu Christu est su veru Signore
Et non pedras, et linnas qui adoramus;
Et qui su idolatrare est grand'errore,
Et nos perdimus gasi, et ingannamus:
Et cum s'audacia sua, et sa eloquentia

Su populu li dal grat' audientia.

19.

Et qu' intro de sas formas qui tenìnius
Esser su Deus nostru, indemoniadu
Spiritu si b'inserrat, et servimus
A su qui est in infernu condemnadu
Et qui sos sacrificios qui offerimus
Nos duplicant sa pena et su peccadu;
Et concludit in summa, qui su Christu
Est veru vivu Deu, et veru adquisitu.

20.

Et usant una finta humilidade
Una grand' abstinencia et orationes;
Et cum custu ad se tirant sa Citade
Ad sas publicas suas predicationes:
Cum totu quirant fagher'amistade,
Et intro dughent'unas confessiones
Secretas, qui subvertint certamente
Ad pagu ad pagu tota cudda gente.

21.

Sunt homines de stoffa et de manera,
Et mustrantsi in sas lìteras versados;
Et sunt pro tesser retes, et minera
Fagher, qu' intra restemus incapados,
Si cum rigorosissima, et severa
Manu prestu non sunt decapitados,
Intender dè custos contradictores
Fàghersì de su Regnu Imperadores.

22.

Mira qui su negotiu est importante,
Et non suffrit nessuna dilatione,
Qui podet esser como in cust'istante
Qui andemus totu in mera perditione;
Qui cuddu Bezzu bi est cane latrante,
Qui cum finctos exemplos, et rajone
Usat ingegnu, ordinzu et subilil'arte,
Qui nd'hat tiradu ad ipse bona parte.

23.

Non unfiat mai per subita tempesta
De grossissimas abbas su corrente
Caudale riu, ne pius girat sa testa
A caldu estivu Libicu Serpente;
Quant' in esser sa cosa manifesta

Gunfiat, et girat custu Presidente,
Et cumandat qui siat adparizzata
Barca, o Frigata in totu ben' armada.

24.

Et qu' islighent sa vela, o remighende
Tirent versu de Turres sa Citade,
Et qui custos malignos agatende
Non li usent actu alunu de pietade:
Ma si esseret possibile rastrende
Los tirarent cum omni crudeltade,
Ad custos de sa Lege perversores,
Et de tantos ingannos inventores.

25.

Darelis querzo exemplares castigos
Ai custos insolentes discarados,
Pro qui restent sos ateros amigos
Ipsoro, cum su exemplu admonestados;
A' i custos capitales inimigos.
Qui'tantu male sunt acconsizados.
Narende gasi, ispissu si mordiat
Su didu in bucca, et d'ira s' accendiat.

26.

A sos ventos dant vela, et cun sa manu
Faghent forza ad su remu, et subra ispumas
Volat versu su portu Turritanu
Sa barca, pius qu' in aeras volant piumas
Arrivados disbarcant in su pianu,
Principiu, qui su Coro mi consumas,
Et causa das qui fectant s'ojos rios,
Morte de Sanctos tres Martyres mios.

27.

Los agatant in logu in ue soliant
Viver, sempre in abstractu cumtemplende
Sa ineffabile Altesa, in ue sentiant
Immensa gloria cun Deus cumversende:
Sa pena, su martiriu si queriant
Fuer, los potint mas ipsos bramende
Istant su punctu, s'hora, sa giornata,
Qui l'esseret per Christu morte dada.

28.

Execùtant sos crudos mandamentos
De s'africana Serpe avvenenada,
Et sas mansas berveghes senz' istentos,

Et senza forza d' armas, nen d' ispada
Ja sunt presos, ligados, ja sunt tentos
Et intro de s' ipsoro alma sagrada
Sentint pius allegria, et cumtentesa
Qui non sa carre infirma sa tristesa.

29.

Los imbarcant cun furia, et cuddos Sanctos,
Quale angione portadu ad sacrificiu
Cantend' istant sos versos et sos cantos
De su devotu Re, divinu officiu;
Non timent pena, morte, non ispantos
Aspirende a cudd' altu beneficiu,
In ue pro unu mortale suffrimentu
Eterna gloria, eternu est su cuntentu.

30.

Brothu, su perfectissimu Oradore,
Et valente Theologu, vidende
Januari Sanct' esser d'annos minore,
Et d'ipse alguu tantu dubitende,
Qui pro carissima, o pro qualqui terrore
Su barbaru laudaret isvoltende,
Lu exortat in sa barca, et dat consizu
Séndeli babu, et mastro, et ipse fizu.

31.

Naréndeli, ja venit fizu s'ora:
Pro fagher de sa fide esperimentu,
Ja sa pedra de toccu, et partidora
De s'oro sa finesa de su argentu
Pro vider si est tot'oro, o dae fora
Adsistit solu su deauramentu,
Venit cum ipsu adspersa, et violentia,
Si finesa li faghet resistentia.

32.

Como ti s'hat a parrer, fizu meu,
Si has como esser constante, firmu et forte
A cuddu veru trinu, et unu Deu,
Et sufferrer cum gaudiu, et pena, et morte:
Non t'ispantet su visu horrendu et feu
De custu barbariscu, pro qui a sorte
Diciosa l'has a tenner a soffrire
Per Christu ogni trabagliu ogni martire!

33.

Non piaghere, o ricchesa transitoria

Qui solet ingannare ad sos ignaros,
Qui tenent cuddos pro cuntentu et gloria,
Quales sunt sos carnales, et avaros
T'ingannet, nò; ma sighi qui victoria
Ti s'adparizzat de sos donos raros;
Qui mai nessunu si nd'est coronadu,
Si cum affannos non l'hat conquistadu.

34.

S'intrare in campu et ponesi in battaglia,
Et posca ad su primu impetu fuire,
Pro qui non sili rumpat carre o maglia,
Non podet sa victoria conseghire:
Mas cuddu qui s'est factu una muraglia,
Et non curat de colpos, nen martire,
Cussu est veru soldadu et defensore
Gelosu de sa fide et de s'honore.

35.

Pensa in cuddu, qui solu a complimentu
Hapisit sas divinas perfectiones;
De su quale ogni sanctu movimentu
Perfectas sunt ad nois instructiones:
Cussu in terrenu et basciu alloggiamentu
Sentire querfit varias passiones,
Totu pro nois; et tue pr'ips'in cust'ora
Suffre cum patientia, morte ancora.

36.

Pro redimer ad nois s'est humanadu,
Et cum nois viver querfit cum istentos;
Pro querrer tant'ad nois hat suportadu
Infinitos dolores et tormentos;
Sos pês, sas manos, su sanctu costadu
L'abbersint, et sos sacros sentimentos
Li penetraint ispinas velenosas
Pro fagher salmas nostras gloriosas.

37.

Et cuddu qu'in su coro, intro sa mente
(Ancu qui fuit in juvenile etade)
Teniat depintu a s'altu Omnipotente,
De gratias fonte, et mare de bontade;
Pius firmu, pius constante, et permanente,
Qui non sa rocca ad ventu, ad tempestade
In sa Fide istaiat senza suspectu,
Sende in Terra naschidu, in Chelu electu.

38.

Sa pureza in spiritu elevada,
Sas intragnas de sanctu amore accesas,
Et sa benedict'anima volada
In cuddas sempiternas contentesas;
Et qual'una persone addormentada
Qui happet in somniu cosas medas intesas,
Januariu s'ischidat; et ad totu
Respondit, qui preposit Sanctu Brothu.

39.

Narendeli, non dubites niente,
Firma columna in Paradisu nada,
Qui tenzo s'alma indivisibilmente
In ue la tenes tue posta et fundada;
Sas lusingas, ispantos, su tagliente
Ferru, qui istrazzent sa carre penada,
In me fagher dènt cuddu movimentu,
Qui faghent ad s'iscogliu, s'abba et ventu.

40.

Confido tantu in cuddu qui infundisit
S'alma immortale in sa terrena veste,
Su qui per puru amore descendisit
In terra, dai su Thronu altu celeste;
Su qui su propriu samben isparghisit
Pro liberare a mie de eterna peste,
Qui mi det dare fortaleza, e ischire
Da pàrrermi una manna ogni martire.

41.

De morrer su santissimu desizu
Per Christu in me crescher si dêt ogn'ora,
Qui fua, mai non hapas contivizu,
Si mortes milli, o pius sentire ancora;
Sa carre torret quale a mama fizu,
Et s'anima in sos Chelos gosadora».
Narrende custu, arrivant in su portu
Seragusanu, montuosu et tortu.

42.

Non tantu prestu istetint arrivados,
Qu' ad superbu adspectu, ad sa presentia
De Barbaru, istetisint presentados,
Et cuddos senz' acatu et reverentia,
Non de colore, o d'animu mudados,
Isetant sa dimanda , et pertinentia,
Qui contr'ipsos pretendet su Paganu

Cun furia tanta, et coro aspru, inhumanu.

43.

Et cum cara turbada, et de ira accesos
Oyos, los mirat narende, ite gente
Sunt custos, qui vidèndesi ja presos
Istant cum modu tantu irreverente
A conspectu de quie morte, et illesos
Los podet dare, et fagher de presente?
De ue sunt? ad quie adorant? ue isperantia
Tenent cum tanta firma cumfidantia?

44.

S'ischire queres da ue descendimus
Respondent, et sos noslros sunt istados,
Et nois ad quie adoramus, et servimus,
Et cum quie solu istamus confidados;
De Turres sa metropoli venimus,
Et in cudda naschidos, e' allevados,
Et ogu'isetu nostru, coro et niente
Lu tenimus in Christu Omnipotente.

45.

Ne penses qui timore de tormentu
Hapat forza de faghernos laxare
Su caminu sanctissimu, s'intentu
Qu' eternamente in nois hat a durare;
Ne perdas tempus solu unu momentu
De querrer su contrariu immaginare
Qu'est propriu batir'abba a sa marina,
Et rumper cum sa canna sa codina.

46.

Mas tue qui su discursu has inveladu,
Cunvertidi ad sa fide sancta, et vera,
Si fin' ai como has sempre idolatradu
In tenebrosas nues senza lumera ,
Pianghe su tempus pro te mal' andadu,
Innantis de finire sa carrera
De custa breve vida tota istentu,
Qui da pustis non valet pentimentu.

47.

Laxadi d'adorare sas figuras
Magicas, et sas pedras incantadas,
Qui te portant vivende in sas iscuras
Cavernas, de sas animas damnadas:
Fue meschinu tantas disventuras,

Primu qui in terra restent sepultadas
Carres, qui tempus tantu hant substentadu
Un'incredulu coro, in fidu fiadu.

48.

Non piaquit sa risposta ad s'institutu
De sos Romanos, tantu condecante;
Ne sas àrbores desint cuddu fructu
Qui pensadu s' haviat intro sa mente;
Su crudele et tirannicu distructu
Designu, istetit de simile gente;
Gente qui istimant custu viver tantu
Quale su surdu s'artigiadu cantu.

49.

Intesu cuddu perfidu qui hapisit
De sos martires mios sa conclusionem
Cum rigore grandissimu querfisit
Qui Brothu esseret postu in sa presone;
Et cum graves cadenas li chingisit
Su tuju delicadu, et sa persone,
In logu qui su Sole, nen chiarura
Non bi agatant intrada, nen fissura.

50.

Et ultra de sa tanta obscuridade
Bi fuit una prudentia, unos fetores,
Et dae cudda terrena humididade
Naschiant unos pestiferos humores;
Et ad s' almu sacrariu de bontade
Li pariant totu gesminos, et fiores
Solu sentiat un' extrema dolentia
Dai su cumpagnu sou fagher' absentia.

51.

Cust' est sa pena sua mortal' et dura,
Qui humidu tenet s' angelicu visu,
Non sa catena, o sa presone obscura,
Mas de Januari viderse divisu
Li curret ad su coro una paura
De s'alma nada pianta in Paradisu,
Qui pro esser cudd' in sa plus vird' etàde
Non si torchat cum plus facilitade.

52.

Ahimè? si Prothu vivet cum sa morte
In logu tantu fetidu obscuridu,
Ne su Juvene sanctu hay mezus sorte

Cum sas carissias de su cane infidu!
Antis li creschit desigiu pius forte
De vidersi tractadu et abhorridu,
Qual' est su mastro sou, et sa tardantia,
Nova pena li dat, nova isperantia.

53.

Mas cuddu quale fuit predestinadu
Adsister sempre ad sa divina essentia
Firmu, forte, et constante in un' istadu
Ad ogni colpu faghet resistentia;
Preghende intro su coro acongoxadu
Ad sa summa bontade, ad sa clementia
Qui l' infundat virtude, et fortaleza,
Qui vincat cum sa morte s'alta impresa.

54.

Vistu qui non carissias nen timore
in custos tales faghent movimentu,
Venit in tanta rabia, in tantu ardore
Qui tremet quasi quale fogia ad ventu.
Da s'ira trasportadu: et da furore
Non agatat reposu, nen contentu
Tentat atera volta discantare
Sa firmissima rocca posta in mare.

55.

Et gasi ad sos ministros, et Porteris
Cumandat qui de Brothu sa persone
Cum sos ateros portent presoneris,
Pro ischire d' ipsos s'ultima intenzione:
Su qu' est hoe, cras, et su qui fuit janteris,
Qui non lu mudant nò, ferru o presone,
Et hat com' esser sempre, et sempre in vanu
Quircat s'intentu sou custu Paganu.

56.

Ad narrerli cominzat, poverittu!
Non istes pertinace in tant' errore
Qui de poveru nudu, presu, adfflictu
Vider ti dês abbastadu Segnore;
Pianlare depo totu per iscriptu
Ad s'ateru, et ad s'unu Imperadore
S'in sos idolos credes, tene certu
Qui haver dês plus de su qui t'hap' offertu.

57.

Non querzas cum istratiu, et cum turmentu

Finire custa vida desizada.
Muda su falsu erroneu pensamentu,
In sa Lege da'nois tantu adprobada,
Si discursu has pro pagu, o intendimentu;
Fagher non podes pius cosa accertada;
Non li perdas li narro, fue sa morte
Qu est s'ultima de penas sa pius forte

58.
Cum pius istizza; et cum pius disacattu
De sa prima risposta est sa segunda;
Cum pius isconzu narrer, et disfactu
Creschit in Brothu de colera s'unda
Narrendeli, oh tra nois vera retractu
D' una furia infernale, cega immunda!
T' imaginas qui premiu o qui timore
Mi privent' mai da su divinu Amore.

59.
Non repliches nen tentes pius su vadu
Qui totu est pistar' abba in su mortellu;
Qui quantu pius dep" esser flagelladu,
Caru et dulce dêt esser su flagellu:
Restet sa carre fritta, et desossadu
Su corpus dai mortiferu martellu,
Qui dêt esser non morte dolorida
Antis gioiosa, allegra, et nova vida.

60.
De patientia ogni ligame, et frenu
Intesa sa risposta risolula,
Rumpit s'aspide, colmu de velenu.
Et sa mentale machina destructa,
D'ira, et de rabia a su solitu pienu
De su designu ogn'isperantia ruta,
Determinat de dareli una morte
Intesa non mai pius vista pius forte.

61.
Restat ad probe ad s' unda Turritana
Un'insula deserta, aspra et buscosa;
Qui algunas voltas soffiat framuntana,
Qui la rendit pius aspera, et nojosa,
Custa sa larga domo fuit,et tana
D'una razza de serpes velenosa,
Qu'in su tempus passadu in cudd'antiga
Etade, fuit de s'homine inimiga.

62.

Non solu serpes, mas lupos rabiosos,
Dragos, ursos crudeles, et leones
Teniant totu sos passos timorosos
Infectos ad su samben de persones
Subta sos corcovados, et annosos
Quercos, bi nde viviant a millones;
Et dae cue hapisint in Sardigna intrada
Pr'esser ad s' hora pius dishabitada.

63.

Custu est su logu custu est su disterru
Inue s' iniquu Juighe hat destinadu,
Qui su martire sanctu, non de ferru
Morgiat, mas d' animales devoradu.
Oh veru purgatoriu, antis inferru
In custu mundu fra nois figuradu!
Non dent haer forza, nò, venenu o dente
De nogher ad su puru; ad s'innocente.

64.

Providet qui cum bàrdias vigilantes
Lu portent, in su logu antigamente
Cornicularia da' sos viandantes
Jamadu, et s'Asinara ultimamente,
Et lu laxent in mesu sas bramantes
Feras, qui lu devorent de presente
Et ipsos pro qui restent totu illesos
Fectent sas bardias da' logos attesos.

65.

Ligant cum doppias funes et cadenas
Cuddu qui pro s'amore divine,
A gustare tormentu, angustia, et penas
Andat cuntentu, ad su logu mortale.
Su samben mi s'infrittat in sas venas,
Si ti contemplo cum s'aju mentale!
Qual' andas, quale viver dês inie
Solu, famidu, et cum morte ogni die?

66.

Jompidu in su disterru, et isbarcadu
Postas sas bardias da hue s'est partidu,
Torrat su lestu Brìgantin armadu,
Et restat Brothu in s' affannadu lidu.
Passada non mes' hora, qu' est intradu,
Sentit attesu un'urlu, unu bramidu,
Qui com' haer postu ad sos montes terrore,

Et intro de s' inferru anxia, et timore.

67.

Oh! quantos pensamentos varios, quantos
Li passant in sa mente, et isbizadu'
Lu tenent de continu cum ispantos
D' esser d'in hora in hora devoradu!
Li faghent su matessi ater' et tantos
Penseris; agatendesi privadu
De ogni substentamentu corporale,
Et gasi ruet de un'in ateru male.

68.

Morrer si sentit de su famen puru,
Et procurat quircare nudrimentu
Ahi! casu tropp' istranzu! ahi! casu duru,
Qui faghes in sas pedras sentimentu!
Non vivet sol' un' hora mai seguru,
Et tenet solu per mantenimentu
De sa misera vida aspra, et meschina
Lestincu, murta cum joga marina.

69.

De miserias miseria ultim' extremu!
Adflictu, abandonadu et isconfusu
Solu da' s' adiutorju altu, supremu,
Vitale filu tórquidu in su fusu:
Naschidos animales d'alga et femu
Tenentes solu su natural' usu,
Su cibù ipsoro tenent cumpetente;
Et tue privu d' ipse servu prudente?

70.

In mesu de duas mortes, faghes vida;
Si vida propriamente est istimada,
Da' s'una cum timores combattida,
Da' s'atera da famen extenuada:
Anima in milli partes repartida,
Et in ciascuna d' ipsas tormentada ,
Mudare dês custu mortale istentu,
In gloria eterna, in summu altu contentu!

71.

Gasi in custa miseria tantu forte
Cominzat cum sos ojos lacrimosos;
Segnore de sos Chellos! si sa morte,
Et custos passos tantu dolorosos,
Queres, qui senta, et queres, qui supporte

Et sunt ad tie acceptos, et gratiosos,
Daminde pius, qui los pota sufferrer,
Et fecta si su tou, non su meu querrer.

72.

Prostrados sos benujos, et in Chelu
Alzat sa vista, et junctas ambas manos,
Per cuddu sitibundu, ardente zelu
Qui hapistis in salvare sos humanos,
Ti prego, salva custu humidu velu
Dai custos animales tantu istranos;
Et qui de cuddos restent liberadas
S'insulas duas; et d'ipsas sas contradas.

73.

Penetrat sas orijas divinales
Sa supplica da' punctu coro essida.
Et subitu remediū ad tantos males
Venit, da sa Prudentia alta infinida:
Et restant cuddos brutos animales
In pagas dies totu privos de vida:
Et de s' hora mai pius fera maligna
S'est vista in s' Asinara, ne in Sardigna.

74.

Oh! sola incomprehensibile sentia
Manu in succurrer mai abbreviada;
Usas pietade sempre, usas clementia
Ad s' anima qui in te s'est appoggiada;
Sola cum sa divina tua potentia
Miraculosamente est liberada
De su servu fidele sa persone
Da s'ursu, da' su Dragu, et da' leone!

75.

Et mentres Brothu in varios modos perit,
Barbaru, pro inquietare sos Christianos
Da Corsiga in Sardigna si transferit,
Disbarcat in sos muros Turritanos.
Cust' est sa occasione qui si offerit,
A totu discredentes de sos vanos
Idolos, et mustrare qui sa morte
Sufferrerla pro Christu est vida, et sorte.

76.

Setida Turres probe ad sa Marina
In cussu tempus fuit in altu alzada
Sa ricca et pobulosa, qui in ruina

Citade andait, como dishabitada;
Sa qui fuit de sas ateras regina,
Per gherras como in piùere torrida,
Qui appenas, naro, sos modernos figios
Agatant in te pedras, nen vestigios.

77.

Una sumptuosa inie fabrica fetit
Intro de sa citade su Africanu,
In ue mult'annos vissit, et istetit,
Regnante su crudele Diocletianu:
Et si tantos, et tantos la disfetit
Giros d' annos, et lustros in su pianu
Restat memoria ancora ivi prostrada
De Barbaru su Re domo jamada.

78.

Cum ipse portat per terra et per mare
Pensande, qui cum fagherli carissias
Su jùvenu devotu Januare
Cunsentat ad sas tantas suas malitias;
Tentat de fagher su piumbu volare,
Et in contrarios cursos amicitias,
Et de fagher sa nocte claru die,
Su sole frittu, et calda esser sa nie.

79.

Algunas dies reposend' est istadu
In Turres sa citade, senza intender
In cosa alcuna, et posca hat cumandadu
Qui andet ad s'Asinara a Brothu prender;
S'ateru tenet adstrict' et ligadu,
Forti cum custu lu dêt poder render
Devotu ad su damnadu, et crudu intentu,
Mas tot' ispargher est in s'aria ventu.

80.

Si sedit unu die pro tribunale,
Et accudit inie tota sa gente
Plebea, cittadina, et principale
Pro visitare ai custu Presidente:
Notoriu bi est, qui s' altu imperiale
Consizu, narat, tantu prèminente,
In Corsiga et inoghe m'hat mandadu,
Quale una forma d' ipse, unu trasladu.

81.

Pro qui rigidamente castigados

Restent sos qui non dent sempre adorare
Sos idolos da nois reverentiados,
Et sa Christiana Lege abandonare:
Ma fin' ai como fimus occupados
In ateru negotiu de tractare
De pius importu, et pius necessitate
Pertinente ad sa Regia majestade.

82.

Pro tale causa fagher non podimus
Justitia de sos pagos Christianos,
Qu' in presones de Corsiga tenimus
Rebellos ad s' imperiu de Romanos:
Mas como cumandamus, et querimus
Qui totu citadinos, et villanos
Cum diligentia sos tales quirquedas,
Et de nantis de nois los presentedas.

83.

Brothu torrada fuit da' s' Asinara,
Et postu de presente in un' obscura
Presone, in ue bi fuit sa effigie cara
In terra ultimu extremu de natura;
Sa vida inconsolada trist' amara
Si li convertit piena de dulzura,
Quando videt inie su fizu amadu
Discipulu, et cumpagnu desizadu.

84.

Sas penas, sos affannos, sos tormentos,
In vider de Januari sa constantia
Si voltant in piagheres, et contentos
Ripienos totu in sa divina amantia:
Non lu cumbatit pius sos pensamentos
Timorosos, qui fectect mai mudantia;
Pro qui in su coro inserta li est virtude
Divina, et ben' exposita in juventude.

85.

Sos ministros los portant tot' umpare
Presos cum grande numeru de gente.
Festosos andant Brothu et Januare
Allegros sempre cum cara ridente:
De su logu, desaries, terra et mare
Non l'hant mudadu, o noghidu niente;
Ma su visu pius biancu, et pius polidu
De Brothu muistrat pienu et coloridu.

86.

Restat Barbaru in viderlu ispantadu,
Pienu de meraviglia intro su coro;
Qui Bruthu in sos affannos siat torradu,
Qual'in su fogu torrat su fin'oro.
De cinere in colore s'est mudadu
Su visu de cust'impiau, et crudu moro
D'annuzu, et de fastidiu, qui sentiat
Vider a Brothu, qui mortu faghiat.

87.

De s'ateru, et de s'unu Imperadore
Como, li narat, dês como imparare
Connoschere sa forza, et su valore,
Et cum strazios tuos l'has a proare
Non ti como esser mezus, cust'errore
Lassarelu da'parte, et cuntentare
In querrer, su mandatu, et voluntade
De s'imperiosa invicta majestade?

88.

Si custu faghes connoscher des claru
Qui l'acconsizo su veru caminu:
Tentu des esser da' me su pius caru,
Qui siat in custu Regnu o in su vighinu,
Repuadu des esser su pius raru
Inter sos sacerdotes de continu,
Sacrifichende ad sas nostras figuras
Factas cum tantu costu, et tantas curas.

89.

Mi pesat, narat Brothu, veramente
Qui restes tantu forte dominadu,
Qui t' hapat s' intellectu, coro et mente
S' ispiritu infernale subjectadu,
Et qui una pedra obrada unu niente
Da te siat reveridu, et adoradu
Connoschedi meschinu, et cremi a mie
Lassa, sa nocte obscura, et lea sa die.

90.

Sèrrali dessu coro cussa intrada,
Qui tenet su Demoniu ja prescripta,
Anima de su totu incaminada
A viver, cum demonios sempre adflicta;
Sa lege errante falsa immaginada
Da diabolicas manos tota iscripta,
Abbandonala, et sighi como cudda,

De quie fecit su totu senza nudda.

91.

Adora custu trinu, et unu Deu
Qui fecit Chelu, Terra, et mare, et bentos,
Et desit lughe et forza ad totu arreu
Ad sole, ad luna, ad altos Firmamentos,
Torret su coro tou, quale est su meu,
Vivifica sos mortos sentimentos
Non querzas esser, nò perfidu, ingratu
Ad qui s'esser t'hat dadu, ad qui t'hat factu.

92.

S' unicu fizu in Terra nos mandait
Homin' et Deu, et qual' homine hapisit
Per causa nostra morte, et conculcait
S'infernù, et sos abissos abberisit.
Sas determinadas ivi almas salvait,
Et sas de inoghe quere, et querefisit
Qui quantas voltas committent peccadu,
Dolfidu, et piantu, lis siat perdonadu.

93.

In ventre de Maria Virgine et pura
Su Verbu Divinale s'incarnesit.
Oh! diciosà sa culpa, et sa ventura,
Qui humana carne su Divinu presit!
Naschidu posca ad sa dolente iscura
Viuda su mortu fizu li torresit;
Su toppu andat drectu, et cuddu nadu
Cegu, restat de totu illuminadu.

94.

Su quatrighianu corpus puzzolente
Ad sas anxiosas sorres torrat vivu,
Et cuddu Paralticu dolente
Trint' annos, de ogni male restat privu;
Hor, si custu tractadu altu, evidente
Non ti torrat de s'idoios ischivu,
Narrer depo qui ses de pedra dura,
et qui d' homine solu has sa figura.

95.

In sos Chelos si alzait visibilmente
Sa causa de sas causas, su motore
De s' Universu totu, primu agente,
Custu Divinu nostru Imperadore;
Custu det benner, custu certamente

S' horrible giornata de tremore,
Ad sos bonos pro dare eterna vida,
Et morte ad sos damnados infinida.

96.

Mentres qui tempus has, lassadi tristu
Su caminu qui faghes tantu erradu,
Pedi misericordia a Jesu Christu;
De coro pianghe su tempus passadu;
Cum rejonnes connoschidu has, et vistu,
Qui ses perdidu, et vives ingannadu,
Istatuas adorende de latones,
Per diabolicas factas inventiones.

97.

Custos sunt custos, sos qui ad se tirait
S' Ispiritu Divinu poderosu,
Et a ciascunu d' ipsos inspirait
De faghersi perfectu religiosu;
S'unu et s'ateru in Roma si passait,
Et cuddu Sacramentu gloriosu
Leaint, qu' est prima porta, et fundamentu
D' ogn' ater celebradu Sacramentu.

98.

Da su Sanctu Pontificé ordinados
Caju, posca istesint tot' umpare
Brothu de missa havende sos sagrados
Presos, et d'Evangeliu Januare;
Sende in Turres dae Roma ja torrados,
Cominzaint cum fervore ad preigare
Sas sept' usende misericordiosas
Operas sanctas, ad Deus gratiosas.

99.

El cun sa vida ipsoro, et documentos
Verissimos, et firmos travagliaint
A dare lughe ad sos intendimentos,
Qui tempus tantu in tenebras andaint;
Per doctrina de custos instrumentos
Sas divinales leges si allargaint
In s'Insula, et destructos sos errores
De custos Sanctos Sardos Preigadores,

100.

Qual' homine qui mancat de rispostas
Qui subito si accendit in furore,
Non podende accudire a sas propostas,

Ponende totu in gridos et rumore;
Gasi de Brothu ad sas rajones postas
Faghet Barbaru iniquu, et traitore;
Et cumandat cum cholera, et annuzu,
Qui lu betent da inie cum calch' et punzu.

101.

Et cum cara piaghente, et amorosa
Si voltat ad su juvene Januare;
Et cum boghe submissa, et tremulosa,
Adprobe silu faghet accostare,
Et fingit d' haver s'anima pietosa,
Forsi poderlu , forsi ad se tirare,
Narendeli, mi dolzo istragnamente
De factos tuos du puru coro, et mente.

102.

Qui querzas in sa mezus terachia
Perder sa vida pro seghire errores;
Fizu, in amore de s'anima mia,
Fue sa morte, et de ipsa sos dolores!
Ti promitto si mudas phantasia
In fagher sacrificios, et honores
Ad sos idolos nostros, favoridu
Pius de te in corte non dêt esser vidu.

103.

S' in custu m' has piagher, quantu ischire
Dimandare mi dês, sempre atorgadu
T'hat com'esser, et fagherti servire,
Et viver in sa corte regaladu.
Non querfas dilatare ad consentire
Custu, qui ateras boltas t' hapo nadu.
Non ponzas mente no, bellu teracu
A' cussu iscarveddadu ai cussu macu.

104.

TI juro cum solemne juramentu
Si ateramente faghes, qui una morte
Vituperosa, ne cum pius tormentu
Fût vista mai in sa Romana Corte
De custa; pro sa quale un' ordimentu
Ti facto d'unu istamen crudu, et forte,
Pro finire sos ossos cum su fiadu
Cum cussu Bezzu tou compagnu amadu.

105.

In tantos pezzos mi podes partire

Quantu hat su mare arena; arbores, fozas,
Qui mai in eternu depo acconsentire
Ad sas damnadas tuas perfidas bozas;
Strazialas quantu queres cum martire
Custas de Terra factas mias ispozas,
Qui quantu pius det esser su tormentu,
Tantu pius grand' expecto su cuntentu.

106.

Non ti trabaglies pius cum argumentos
Sophisticos et falsos de pretender,
Qui cum daremi penas, et istentos
In diabolicas formas depa intender,
Pro qui su fine meu sos pensamentos
Sunt s'alma dare a quie l'hat facta, et render,
Et fruire de gloria sempre inie,
In ue sempre est chiarura, sempre est die.

107.

Non si alzat tantu brava unda marina
Quando ispinta est da borea, et aquilone,
Qui torrat bassa ogni montagna altina,
Quantu custu Megera, et Tisiphone:
Vistu qui in modu alunu pius rapina
De custos ne cum fieros, nen rajone
Podet fagher, cominzat a pensare
D'ite modu los podet tormentare.

108.

Cumandat qui los lighent strictamente
Cum rudes funes, cum fortes cadenas
Qui non lis restet ossu renitente,
Qui non si rumpat pro sobranas penas
Da' su talone ad sa pius eminente
Parte, de samben pioent totu sas venas.
Stratiat sas carres sacras su Boccinu
Cum acutados pectenes de linu.

109.

Gasi pioende a samben, et ligados
Peri sa terra los fetit passare
Et subra cuddos membros flagezzados
Li fesit senza contu azzottas dare:
De sas abbertas carres sos segados
Ossos, et nervios si podiant contare;
Isfactas cuddas sanctas cumposturas,
Et de samben cobertas sas figuras.

110.

Los tormentat ogn'hora ogni momentu;
Forsi pro su grandissimu dolore,
Mudarent cuddu eternu pensamentu,
Qui in Christu tenent veru Redemptore;
Mas, quantu pius lis duplicat tormentu
Tantu pius creschit su divinu amore;
Ad tales qui sa frusta, et sa tortura,
Respectu ad tantu amore, l'est dulcura.

111.

Prorogat sos martirios cominzados
Ad pius comodum tempus de passione;
Et cumandat qui siant disatrozzados,
Postos cun griglios intro sa presone,
Et pro qui stent seguros, et bardados,
De Gavinu Savelli sa persone,
Cavalieri antighissimu Romanu
Jamet cum boghe, et signat cum sa manu.

112.

Et li narat, t' intrego custos presos
Finissimos ribaldos, seductores,
Da' sos quales sos idolos offesos
Restant cum tantu obbrobriu, et dishonore,
In esser dimandados mi siant resos,
Qui penso, cum sos colpos venidores,
Mudare lis dent fagher phantasia
Su grave aspru martiriu, et presonia.

113.

Paganu, quale Barbaru Gavinu
Fuit ad s'hora, et cum ips'istaiat;
Et portendelos presos in caminu
Unu Salmu cantare lis sentiat,
Implorende s' auxiliu altu divinu,
Qui su coro et intragnas li moviat
De pura teneresa et de pietade,
De viderlos usare crudeltade.

114.

Attentas sas orijas ad su cantu
Delectabile, dulce, et amorosu,
Pienu Gavinu de Ispiritu Sanctu
Torrat cum ipsos misericordiosu,
Et cum voghe tremante, mixta in piantu
Cominzat, qual' un' homine anxiosu
De ischire intentu causas, et rajones

Proite suffrint martirios, et passiones.

115.

Et lis narat, qui est custu Redemptore
Vostra qui tant' amades, et priteu
Suffrides tant' istraliu, et dishonore?
Ite bos hat a fagher cussu Deu?
Certa est sa pena, certu est su dolore
Qui vos consumat, quale ad fogu seu.
Su premiu, it'hat com'esser, si finides
Sa vida, qui pro Deus tant' abhorrides?

116.

S'ischire queres, cavaglieri hondradu
De custu nostru Christu s'alta essentia,
Non qu' est nessunu in custu mundu nadu,
Qu'explichet su esser sou cum sa potentia,
Custu sol'est, qui ad totu nos hat dadu
Anima et corpus senza differenzia
Su corpus transitoriu, s'alma eterna
Et quantu videt custa vista externa.

117.

Cust'est, su qui dat esser ad sas cosas
Et ponit ad sas abbas, et a ventos
Termen, et sas istellas luminosas;
Et girat sos celestes movimientos
Cust'est qui faghet s'almas gloriosas
In s'ultimos imperios, apposentos
Dae nantis de s'Ispirtu, Babu et Fizu
In ue ademplit' est querrer, et desizu.

118.

Qual' est de custu Christu inamoradu
Cum ipse est un' ispirtu, una bontade
Et si su corpus morit tormentadu,
Est pro gosare vida, et veridade:
Oh venturosa s'alma, o riccu istadu
De tanta gloria in cudda eternidade
Ue sos Anghelos istant abovados
De gloria pienes, et non mai satiados!

119.

Cust' est su premiu, cust' est sa triumphosa
Palma adquistada per custu caminu,
In ue caminat custa nostra ansiosa
Alma, pr'obtenner thesoro divinu.
Non ponzas cussa perla pretiosa

In fogu eternu, o miseru Gavinu!
Cre firmamente in Deus, qu'has tempus como
De fagherli in su Chelu eterna domo.

120.

Non tantu prestu in viva fiamma ardente
Si accendit solfanellu, et dat lugore,
Quantu prestu Gavinu de repente
Si acendit totu de divinu amore
Et de sa obscura carcere, patente
Faghet sa porta cust'altu amadore,
Et lis dat su caminu, et libertade
Totu pienu d' ispiritu et sanctidade.

121.

Et lis narat, pregade Sanctos mios,
Cum voghe humile, et bascia, achristianada,
(Factendelis sos ojos quales rios
Considerende sa vida passada),
Qui conservet in me penseris pios,
Et custa fide in s'anima incastada
Indelebile fectet s' Altu Deu
In sas intragnas mias in su cor meu.

122.

Innantis de partire da' presone
Cum sa materia, et forma requerida
Renovat de Gavinu sa persone
Mediante custos Sanctos convertida
Senza sa quale sancta introductione
Non si podet andare a eterna vida;
Et gasi est factu fizu in su Baptismu
De cuddu de judicios largu abismu.

123.

Et restat su character imprimidu
In s'anima cunversa, quale intagliu
De fine nughe postu, et resarcidu,
Contextu cum grandissimu trabagliu:
S'anima cum su corpus tot' unidu
Los consacrat a' custu altu Admiragliu
De custu mare undosu, et turbulentu
In ue non qu' hat un' hora de cuntentu.

124.

Oh! generosu cavaglieri antigu,
It'in amare has factu, ite mudantia!
Qual' est istadu cussu veru amigu,

Qui rupidu hat su velu de ignorantia?
Oh! eternu amparu, oh! discansadu abrigu
Qui ti promittit sa divina amantia?
Oh! conquista ricchissima de gloria
Qui piango, et goso de sa tua memoria!

125.
Oh! sancta conversione, o coro accesu
De divinales fiammas, et amores
Qui has illustradu, et milli glorias resu
Ad totu de sa domo venidores!
De custu cippu floridu est discesu
Unu ramu sanctissimu in colores
De purpura vestidu, et de morellu,
A qui devotu tantu l' est Rosellu.

126.
Lughet a tempos nostros sa Savella.
Illustrissima domo, antiga, et clara,
Plus qui non lughet matutina istella
Ad sos viandantes de Septembre cara;
Rectore de sa Sancta Navicella,
(Si non est morte de su totu avara)
Vider ti demus Principe, et Sacrariu
De Christu, et de Gregoriu Vicariu.

127.
Alibertados Brothu et Januare
Si occultant in sos plus logos secretos,
Qui potint: et cominzant a pregare,
Cum lacrimas, qui bagnant visu et pectos,
Ad s' Altissimu Deus, lis querzat dare
Forza tanta, qui in ipsos sos effectos,
Qui solent, fagher timore de morte
Non balzant mai, mas los mantenzat forte.

128.
Et a Gavinu ja factu Christianu,
Qui nos hat de tormentos liberadu,
Non timende de Barbaru Paganu
Esser in milli pezzos decogliadu,
De sa clementia tua, da cussa manu
Divina restet semper preservadu
De sa furia de cuddu, et permanente
In sa fide lu fectas pius ardente.

129.
S'ateru die posca a' cudda gente

In publica audientia su manzanu,
Qui li portent sos duos incontinente
Cumandat su iniquissimu Paganu
Quircant cuddos ministros de presente
A Gavinu sanctissimu Christianu,
Et tantu chito fuit, tantu a bon' hora
Qu' in su lectu Gavinu fuit ancora.

130.

In s' aposentu in ue stare soliat.
Su manzanu agatendesi dormidu,
Venner gente infinita li pariat,
Qui cobriant montes, pianos, mare et lidu,
In cust' instante intro de se sentiat
Una voghe, narende; ja est complidu
Su termen disizadu, veni fora,
Qui rosegiat in Chelu s'alma aurora.

131.

Istende in custu, unu grande rumore
Sentisit ad sa porta, et sublevadu
Resposit. Qual' est cussu inquietadore
Oui totu su vighinu hat ischidadu ?
Li narat cudda gente; su Signore,
Qui torres sa incumenda, qui t'hat dadu,
Nos mandat, et isetat in Palatu
Qu' est mes' hora su die ja gasi factu.

132.

Et subito qui custa voghe intendit
De sos Ministros da' su Re mandados,
Qui ateru da' Gavinu non pretendit
Si non sos presos, qui li siant torrados,
In vestiresi prestu solu attendit,
Et cum passos pius largos et chitados
Lis narat, prestu andemus ad sa festa
De su triunphu meu, vennida presta.

133.

De custos, fidelissimu adjudante
Querz' esser in sa publica Audientia,
Cum cara allegra, et totu in se gosante,
De Barbaru cumparit in presentia:
In viderlu Luciferu arrogante,
Privu d'ogni pietade, et de patientia
Li narat. In ue sunt sos Christianos
Qui t'integrai, et desi in sas tuas manos?

134.

Prite cussos rebellos no' has portadu
Perpetuos inimigos revoltosos,
Qui s' imperiu Romanu hant dispretiadu
Cum tanta astutia, et modos ingannosos?
Si da' custos ministros avvisadu
Fusti, prite lis das tantos reposos?
Partidi incontinente da' sa domo,
Et portalos ligados como como.

135.

Riet Gavinu, et cum faeddos pianos,
Si firmat, et insistit cum rajones
Narendeli, si custos Christianos
Devotos et sanctissimas persones
Abhorsint cussos vasos tuos prophanos.
Non meritant però tantas passionnes,
Pro qui querent amare, et obedire
A Christu solu, dignu de servire.

136.

Cust' est s' Omnipotente, s' infinitu
Segnore da Segnores adoradu
Cust' est su qui fuisit in Egyptu
Da' su perfidu Herodes tantu odiadu.
Cust' est su qui fectisit sempre adflictu
Su de Hierusalem pobulu amadu;
Cust' est s' ispirtu, qu' est ind' ogni logu,
Et accendit s' almas de Divinu fogu.

137.

Per virtude de custu si rumpisit
Cum sa vara mosayca pedra dura,
Et abba limpidissima bessim,
Iscaturende per ogni abbertura.
Per virtude de custu dividisit
Moise su mare rubiu, et cum segura
Passait gentes de caddos, et pedones
Infinitos migliares, et legiones.

138.

Custu da' s' altos Chelos fulminait
Unu fulgure accesu tantu ardente,
Qui su Re Balthasar totu abbrusait
Publicu peccadore discredente.
Custu est su qui sas mensas adparait
Pienas de manna ad s' affamada gente
In s'aridu desertu Israelitu

Segundu costat per antigu iscriptu.

139.

Cust' est qui pro sas culpas infinitas
Submersit in totale perditione
Sa vitiosa Gomorra, et Sodomitas,
Nefanda plus d'ogn' atera natione.
Cust' est qui perdonait a Ninivitas
Pro qui hapisint perfecta contritione
Innantis de succeder sa minata
Da' s' Altissimu Deus a' cuddos facta.

140.

Josue de Deus amigu, et servu fidu
Per virtude de Deus fetit firmare
A mesu die in mesu de su lidu
Su cursu repentinu altu solare.
Et s'inimigu Paulu convertidu
Raptu in sos Chelos lu fetit volare,
In ue plenu d'ardore, et sanctidade
Connoschesit sa eterna veridade.

141.

Non m' hat como bastare un'annu interu,
Si t'andare contende maravizas
De custu eternu Deu vivu, et veru,
Qui nos salvait de sas undas Estigias.
Ti reputo pius crudu , et pius severu
De cuddu qui sas proprias nadas fizas
Degollaret pro dareli caminu
De salute a su cegu, a su meschinu.

142.

De custu est infiammada s'alma mia
Et querz'esser, et so bonu christianu,
Pentidu de su errore, qui tenia,
Quando fui, quale ses como paganu.
Ad custos tales dadu hapo sa via;
Quircados como, o per monte o per pianu,
Qui non querz' esser de sa propria vida
Capital' inimigu, et homicida.

143.

Non pro meresser meu connosco certu,
Qui sa Divina gratia in me hat mustradu
S'infinita bontade, et m'hat abbertu
Su coro repugnante, aspru, induradu.
Sa sancta, et vera fide ivi hat insertu,

Et m'hat da morte ad vida trasportadu,
Ad vida naro, non custa de un'ora,
Mas a cudda perpetua, et duradora.

144.

Però benzant angustias et affannos
De tale sorte qui una no mas chentu
Vidas, mi s' accabarent cum pius dannos,
Qui no accabaint Istephene et Larentu
Pro qui finidos posca in sos iscamnos
Celestes, in ue est s'alma, et cust'intentu,
Gose de cuddu lumen sempiternu,
Et tue perfidu, ingratu, intro s'infernù.

145.

Connoscher dès ad s' hora sos de terra
Idolos factos da' sas bassas manos
De cuddos qui exercitant lima et serra
D' iscarpellu, et linnamen artesos,
Qu in eterna dolentia, in piantu, in gherra
(Pro haver cretidu in somnios falsos vanos)
Tenner ti dent cuss'alma maledicta
Penada de continu sempre adficta.

146.

Oh profunda sentia! Oh addoctrinadu
Ispirtu senza tempus consumire
In voltare quadernos! Oh! Adquistadu
In un' atimu solu tant' ischire!
Et coment'in intenderti hat paradu
Barbaru qui si sentit consumire,
Manchendeli sa forza, et s' ardimentu,
Considerende su Christianu intentu?

147.

Restat de totu Barbaru transidu
De custa repentina conversione;
Quasi mes' hora istetit istordidu.
Pienu d' una stupenda admiratione;
De colera prorumpit accendidu,
Narende, oh! Intesa mai plus traitione!
Duncas cust' est sa fide, et sa sperantia
Qui in te tenia in cosas de importantia?

148.

Lu suffogat sa rabia, et su furore
Qui ad pena su qui narat est intesu
Gridat narende, ai custu traitore.

De su quale s'Imperiu est tant'offesu,
Leadelu cum totu su rigore,
Qui si potat, adstrictu, et bene presu;
Et qui restet sa limba in bucca fritta
De s' imbustu cum tota sa cabitta.

149.

Et tagliada qui siat intro su mare
Da' sa plus alta rocca, et plus profunda
Bettade cansciu, et testa tot' umpare;
Qui li siant sepoltura arena et unda,
Qui pius non si nde potat agatare
Pezzu nessunu in s'abba furibunda,
Et qui sa testa siat, et s'istatura
Vivanda de sos pisches et pastura.

150.

A ciò qui alunu movidu intellectu
Si in terra nd' agataret qualqui cantu,
Non li teneret creditu o suspectu
In querrerlu adorare quale Sanctu:
Como des visitare cum effectu
A' custu Christu qui disizas tantu
Ai cussu qui lu clamas Redemptore
Mortu cum tant'istratiu et dishonore.

151.

Cuss' est qui da' sos Satrapas Hebreos.
Ad cruda morte istetit condannadu
Cum tantos vilipendios et arreos
De samben in sa rughe conficcadu.
Cussas similes glorias et tropheos
Dês balanzare in esser degogliadu.
Però dadeli pena capitale
Incontinente a' cust' irrationale.

152.

Cum furia, quantu potint, a Gavinu,
Intesu su mandatu , s' isbirraglia
Leant, et pius lu appretat su Boccinu.
Qui non jau duru istrintu de tenaglia,
Su visu plus nolidu de oro finu
De sa turba infidele aspra canaglia
Est deleggiadu como su qui prima
D'ipsos miradu fuit cum tant' istima.

153.

Et versu de Balài sa rocca altina

Sa scelerada isquadra et compagnia
D'isbirros, et porteris, sa divina
Persone portant cum grand' allegria.
Una femina Sancta, qui vighina
Fuit de Gavinu, l' incontrait in via
Sancta et devota in vista, et cum effectu,
Et fuit bona Christiana in su secretu.

154.

Et pro sa connoscantia et amistade
Qu' inter ipsos teniant in bighinadu
S'intenerisit tota de pietade
In viderlu cum funes attrozzadu,
Et cum ardente zelu et charidade
Dimandat ad sa gente, in ue est portadu?
Ite causa, o delictu hat committidu
Essende da' su Re tantu querfidu?

155.

Pro risposta li narant; ad sa morte
Portamus custu intespetadu, et tristu,
Coment'et traitore de sa Corte,
Et servu qui s'est factu a Jesu Christu,
In lacrimas prorumpit tantu forte,
Qui mai canale d'abba non fut vistu
Falare cum pius furia, et fagher rios,
Quantu falant de custos ojos pios.

156.

Et cum piantu corale s'hat isoltu
Da' sa testa, unu velu russu asprinu.
Et piegadu qui l'hat, et in se regoltu,
Lu donat ad s'amadu sou vighinu ;
Et li narat, sos ojos, et su vultu,
Quando s'ultima pena su boccinu
T'hat como dare, imbandadi cun custu,
Qui moris pro essere sanctu, et pro essere justu.

157.

Mi dolzo, qui non poto ateramente
Camparedi sa vida, fizu amadu,
Da' custa dispietada, et cruda gente
Qu' in viderti, sas venas m'hant siccadu,
Gavinu, accepta s'humile presente,
Et leat su velu involtu, et assettadu
Riet sa frotta iniqua de su gestu ;
Veni li narat cras, et lea s'imprestù !!!

158.

O cegos de su totu, et insensados,
Quircades morte a qui bos quircat vida!
Oh ! duros pius de pedra, et obstinados
In sa perfida vostra, et sa mentida!
Prestu dênt esser cuddos collocados
In sa gloria celeste, alta infinita,
et bois eternamente in sa cadenas
de piantu, et dolu, frittu, fogu, et penas.

159.

Non promissas terrenas, non minatas,
Non martiriu incredibile, o turmentu,
In algun tempus da fagher', o factas
Mover dent mai da' custos s'altu intentu.
Sas cosas qui ordinades non sunt aptas
A girare su sanctu pensamentu
De custos qui vidende in custa vida
S'alma tenet cum Christu sempre unida.

160.

Jumpidos ad su logu aspru et silvaggiu
Adprobe de sa rocca imbenujone,
Senza dismaju algu, et cum coraggiu
Pius forte, et pius gagliardu de leone,
Si ponit, et resplendet quale raggiu
De Sole cudda sancta perfectione
Et isolvit sa limba, et mandat pregos
Ad i cuddu qui sanait toppos et cegos.

161.

Narende, oh! eternu Deu, altu Signore,
Gratias ti rendo infinitas, pro quantu
Cum s'adjutoriu tou, et su favore
Mi recies como in su numeru sanctu
De sos martires tuos cum tant' honore
Ad gloria sempiterna , ad triumph' et cantu!
Si benes custa gente infida et dura
Tenet sa morte mia pro disventura.

162.

Dulche m'est custu transitu, et sas penas
Pro te Factore meu, qui m'has salvadu
Da' fiammas infernales, da' cadenas,
In ue tant'annos fui arsu, et ligadu.
Rezzi sos membros mios, nudridas venas
Sempre in su tempus cursu cum peccadu,
Rejon'est qui si purghent cussas culpas

Cum puru samben meu, ossos, et pulpas.

163.

Glorifichende a Tie ogni momentu,
Qui pro summa pietade m' has querfidu
Illuminare custu intendimentu
Tantu tempus de Te disconnoschidu,
Et mi promittis como unu contentu
Senza mai fine, ad mie non meressidu.
Ti consacro cust'alma, et custu coro
Et cum puras intragnas t'amo, e t' adoro.

164.

Et Ti suplico qui sa Turritana
Gente, cabu de Regnu, in ue naschisit!
S'una, et s'atera pianta Christiana,
Qui per virtude Tua mi convertisti,
Mediante sa tua gratia suberana
Qu'in milli duros coros s'inserisit.
De obstinados, et perfidos paganos
Ti siant devotos et bonos Christianos.

165.

Illuminalos Tue, dalis caminu
Qui pervenzant in tanta connoscantia,
Qui accesos de s'amore Tou divinu
De gloria eterna tenzant isperantia.
Si rumpat ogni coro alabastrinu
Incaminadu ad s'infernale istantia;
Et adoret ad Tie cum humiltade
Via de salute, et vera Deidade.

166.

Exalta custu gremiu de fideles
In Turres, et in totu s'universu,
Et remanzat de custos infideles
S'animu puru in Te, Christu, cunversu;
Et da' sas impias manos, et crudeles
Restet su samben meu in terra adspersu,
Qui fectet ad sas almas beneficiu,
Et siat incensu ad Tie, et sacrificiu.

167.

Naradu custu sos ojos s'imbendat
De cuddu velu cum lacrimas dadu
Et narat a su Boja, qui suspendat
Su colpu pro sa testa adparizzadu
Pr' unu momentu, et qui da posca attendat

A su de fagher, et cum visu alzadu,
In manus tuas commendo s'alma mia
Narat, et dat su collu ad s'agonia.

168.

Calat s'ispada, et li segat su tuju,
Saltat sa testa, et sa limba vibrende,
Et fecit su terrenu totu ruju,
Jesus tres voltas istetit narende;
Gasi da' custu bassu regnu buju
Partit s'anima Sancta, ivi laxende
Sa veste transitoria ad tempus dada,
Facta in pezzos, et tota insambenada.

169.

Oh! aspectada in Chelu , anima electa,
Cum tantu triumphu, gaudiu, sonu, et festa
Qu' ogni stella lughida, ogni cometa
Mustrait grand' allegria manifesta,
Su sole in cuddu clima, pius perfecta
Porgisit sa chiarura, et cudda testa
In terra exangue pariat dormentada,
Et de eternu reame incoronada.

170.

Tale logu agataret s'alma mia!
Quando da' custa dêt fagher passada
Vida piena d'istentu, et tribulia,
In ue non qu'hat un hora discansada|
Qui pota cum Gavinu in cumpagnia
De cudda sacrosancta desigiada
Cara fruire, in ue cum cantu, et risu
S'anghelos gosant in su Paradisu|

171.

In esser da'su nodu isciolta s'alma
Sanctissima de custu gloriosu
Martire, et conquistada ja sa palma
De su viver eternu triumphosu.
S'ispoza ivi laxada, et cudda salma
Terrena, intro su mare tempestosu
Bettaint, conforme ad s'injustu mandatu
De barbaru cum tanta furia factu.

172.

Visibilmente fut vistu Gavinu
Da pustis ispiradu caminare.
Calphurniu l'incontresit in caminu

Qui non podiat sa ruta soma alzare,
Essende solu, et fiaccu su runzinu,
Gavinu lu adjudait a barriare,
Et neit : têt custu velu imboligadu
Qui sa muzere tua mi l'hat prestadu.

173.

Paganu fuit Calphurniu, et fuit maridu
De cudda bona femina qui tantas
Lacrimas da'sos ojos li hant corridu,
Naschidas da'su curo, et intragnias sanctas;
Subitu sa muzere qui l' hat vidu
Venner ad domo novamente, oh! quantas
Ndeli falant ad copias abbundosas!
Cunsiderende sas passadas cosas.

174.

Sa muzere agatende in dolu, et piantu
Restat Calphurniu un'omine transidu.
Essend'eo foras, qui t'affligis tantu,
Ite mortale casu hat succedidu?
A Gavinu Savelli, ai cuddu sanctu,
Respondit ipsa, o caru meu maridu,
Vighinu nostru da te tant'amadu
Heris l'hant in Balàì decapitadu.

175.

S'haveres vistu cum ite rigore
De funes, et de ferru adstrictu, et cinctu
Stetit portadu; ad milli, su colore
De pura teneresa tornait tinctu:
Da' su plus vile, et bassu servidore
Tiradu fuit, et da s'ateru ispintu,
Qu' ad piedade hit com'haver certamente
Movidos una tigre, unu serpente.

176.

Tale morte crudele, et inhumana
Mai non fut vista; et narant qui l'hant mortu
Pro qu'in sa fide sancta Christiana
Cretisit, et duos presos hat isortu. (isoltu)
Sos ojos li faghiant quale funtana,
Narende custu, priva de accunortu
Calphurniu qui su die haviat tractadu
Cum Gavinu, restait tot'ispantadu.

177.

O su qui visi est somniu, o eo so macu,

O somnias tue, o l'has immaginadu;
Pro qui Gavinu, et soma, et caddu fiacu
Alzarelos da' terra m'hat adjuadu;
Qui solu non podia, qui fui istracu
De su largu caminu ispoderadu:
E' ad sa partida, peri cuddu chelu,
Mi dait imboligadu custu velu.

178.

Et qu'infinitas gratias referidu:
T'havere de su donu deliciosu;
Et nadu custu da' me s'est partidu
Contentu allegru, et cum coro giojosu.
Li dat su velu a' custa su maridu,
L'isparghet, et l'agatat sambinosu:
In viderlu restait verificada
De Calphurniu s'istoria recitada.

179.

Cretisit sa muzere firmamente
Da' cudda esser torradu in custa vida,
Et qui viviat miraculosamente
S'alma statura in pezzos dividida.
Cominzat posca pius minudamente
Ad referrer sa cosa qui est sighida,
De tale sorte nait, et riferisit,
Qui su maridu moro convertisit.

180.

In su Sanctu lavacru Baptismale
Lu baptizait, pr' esserli cancelladu
Cuddu antigu peccadu originale,
Qui sos padres antigos qu' hant laxadu.
Torrat devotu, et tant' ispirituale,
Qu' est da' multos pro sanctu reputadu.
Oh! diciosu Calphurniu, et cumpagnia,
Qu' in sa Celeste caminades via!

181.

Mentres qui de Calphurniu est balangiadu
De sa devota femina s' intentu,
De puru coro, et mente achristianadu
Persones lu seghisint pius de chentu.
Su martire Gavinu hat visitadu
S' ispelunca, caverna, et aposentu
In ue viviant adprobe de su mare
Su Sacerdote Brothu et Januare.

182.

Lis cumparit ad s' hora su gloriosu
Sanctu Martire dentro in sa caverna,
Et transparit pius claru, et luminosu
De sa candela accesa in sa linterna;
Et cum vultu ridente, et amorosu
Mustringat sa immensa contentesa interna;
Sos ojos li abbarbagliat s'isplendore
De custu novu in Chelu triumphadore.

183.

Sô Gavinu, lis narat, in Balà
Decapitadu, ultra sos tantos males
Qu' innantis de sa morte supportai
Da' cuddos infideles animales,
Et subitu qu' iscioltu mi agatai
De sas fragiles vestes terrenales
De su martiriu isteti victoriosu,
Et vos cumparzo inhoghe gloriosu.

184.

Vennidu so pro darevos avvisu
De sa eterna adquistada gloria mia;
Pro qui potamus hoe in Paradisu
Sos tres andare totu in cumpagnia:
Però cum coro allegru, festa et risu
Ponidebos Cumpagnos mios in via
A gustare su transidu d' un' hora
Pro' una gloria infinita et duradora.

185.

Andade, qui vos est adparizzata
Una perpetua sedia, una corona,
Qui mai priva per tempus, ne vacada
Esser vos det, per nessuna persona:
Custu est su tempus, cust' est sa giornada
D' isplender cum sas sorres de Latona,
Laxende in custu mundu exemplu tale
Eternu ad venidores immortale.

186.

Da' s'Alta Providentia, alma Celeste
A bois mandadu sô, quale vidides
Subta de custa forma, et custa veste
In ue formare s' oju non podides:
Et qui laxada s' humida, et terrestre,
Ambos de sa matessi vos vestides;
Non poto, ne vos depo abbandonare,

Pro qui junctos sos tres demus andare.

187.

Nova digna de milli, et milli albricias,
Nunciu d'eterna gloria desizadu!
Qui porgis milli giojas, et divitias
In su concavu logu, aspru heremadu.
Nova qui da' su coro sas mestitias
Privastis, et su viver affannadu
In gaudiu, in contentesa, in dulce vida
Torrastis, cum sa Sancta tua vennida.

188.

Voghe angelica pura, qu' intonastis
In logu solitariu, et cum clarura,
Sas cavernosas tenebras privastis
Cum s' adsistentia de sa tua figura,
Et firma d'unu pagu cominzastis
De sas corales anxias, et tortura
A contare de cuddas su progressu,
Et de sa morte tua su qu' est successu.

189.

Tale nova Historia si contaret
Ai custa peccadora anima mia.
Et su corpus terrenu, ahimè! gustaret
Tale morte, tormentu et agonia,
Pro qui posca cum ipsos si agataret
In su celeste Regnu de allegria,
In ue sas momentaneas transitorias
Penas si pagant cum eternas glorias.

190.

Considerent s' intrinseca allegria,
Su coro qui de propria teneresa
Lis battit in su pectus tota via
Submersu in sa profunda contentesa.
Nova cum tantu amore et cortesia
Da' sos martires mios a piena intesa;
Nova piena de gloria, nova sorte,
Qu'allegrat s'alma, et atterrat sa morte.

191.

Si da unu Re mundanu, o Imperadore
Venneret un'avvisu, o ver patente,
Qui a unu poveru amigu servidore
Da vivere li daret riccamente.
Ite allegria de tantu favore

Hit como dimostrare infra sa gente?
Non ipse solu, mas su parentadu
S'hit como tenner riccu et exaltadu.

192.

Quantu de pius valore est custu avvisu
De su Re de sos Res claru immortale
Qui vos cumbidat ad su Paradisu
In ue non podet morte, o temporale;
Cum plus rejone su coro, et su visu
Mustrare dent piaghere, senz' uguale,
Pro qui cuddu est d' un' hora, et trabagliosu;
Custu infinitu, et eternu reposu.

193.

Discurrant como sos contemplativos;
Si su viver de inoghe jamant vida
Cum tantas curas, et istentos vivos,
Et posca est da tot' homine querfida;
Quale dent esser sos supremos Divos,
Gosu, et delectos de cudd' infinida
Gloria, qui quantu plus d' ipsa est gustada,
Tantu plus sidis hat s' alma beada.

194.

Hor pensade ite largos et coitados
Passos dent fagher per cudda foresta
Custos veros de Christu innamorados
Vennidos da' sa fuga assai pius presta.
Sos qui sunt novamente cojuados
Nuptias non faghent cum plus cantu et festa;
De custos duos torrende da' s' hermita
Pro laxare in Balài bustu et cabita.

195.

Jompidos sos sanctissimos Christianos,
Pro cumparrer de Barbaru in presentia,
In viderlos sos infidos paganos,
Current prestu ad su Re cum diligentia,
Narendeli, si queres in sas manos,
Senza trabagliu algu, et resistentia
Haver sos duos homines fuidos,
Qu' intrare in sa Citade l' hamus bidos.

196.

Et mentres dat orija ad s' ispione
Barbaru, ecco sos duos liberamente

A ponnersi in sas manos, et presone
De custu Re jamadu, o presidente,
Oh! quantu s' una, et s' atera persone
Cumparit a sa morte allegramente;
Et lis paret un' hora plus d'un' annu
De dare fine a su mortal' affannu!

197.

Restat Barbaru allegru, ipsos cuntentos,
Sos unos in recier, s'ateru in dare;
Mas varios, et diversos sos intentos,
Et diferentes premios dent fructare.
Su Tirannu infidele in sos tormentos
De su baratru obscuru dêt brujare;
Sos duos passada sa paga fortuna;
Lugher dênt plus assai de Sole, et luna.

198.

Et subta de su soliu in tribunale
Setidu cumandaint ad sos criados,
Qui cussos impetidos d'ogni male
Denantis d' ipse esserent presentados,
Et cum fincta dimanda artificiale
Los interrogat in ue sunt istados
Nascosos tantas dies in sa malesa,
Qui mai d'ipsos s' hapisit un' intesa?

199.

S' ischire queres de sa nostra vida;
Dimanda a qui nos has incomendadu,
Pro qui de s' incomenda recevida
De dretu ad dare contu est obligadu;
Cussu t' hat como narrer sa partida,
Comente nos hat soltu et liberadu;
Li respondent sos duos gasi riende
De su qui lis stat BARBARU pedende.

200.

Rieint, pro qu' ischiant certu qui Gavinu
Cumparrer non podiat pro contu dare.
Barbaru intesu custu cum pispinu
Non podiat in sa sedia reposare:
Non voltat cum pius furia unu molinu,
Ne da su ventu ispinta barca in mare,
Quantu girat, et volat cum sa mente,
Torquendesi in sa sedia que Serpente.

201.

A' cussu qui allegades hapo dadu,
Lis respondet, sa paga conveniente
Et pagas horas sunt qu' est barigadu.
A visitare ai cuddu Omnipotente
A' cuddu qui da bois est tant' amadu,
Et reveridu de coro et de mente;
Cun ipse fagher dezis un' andantia,
Si non laxades sa vostra ignorantia.

202.

Barbaru plus prolixu in sas rejones
Esser queriat, et cuddos brevidade
Quircant de venner ad sas conclusiones
Pro partire in duas partes sa unidade
Interrumpit sas largas responsiones
Pro grangeare pius sa eternidade,
Et lis paret mill' annos su momentu
Dubitende de alunu impedimentu.

203.

Brothu respondet, como sô chiaridu,
Qui de su totu ses indemoniadu,
Et qui non has discursu, nen sentidu,
Senza judiciu, et sinnu alunu nadu,
Pro qui ti paret mezus su partidu,
D' istare eternamente cundemnadu
In penas, qui cum solu las pensare
D' ispanu faghent sos pilos rizzare.

204.

Et nos reputas macos, et grosseris,
Essende tue su macu et su innocente,
Qui in reveladas formas de torneris
Tenes fiducia tantu macamente.
Et collocas inie coro, et penseris
Senza discursu alunu vanamente:
Ad tie solu non perdes, mas ancora
A' custa gente nada et naschidora.

205.

Non ischis tue qui stetit pronunciadu
Per buccas de Sibillas, et Prophetas,
Qui in su ventre sanctissimu sagradu
De cudd'Unica, et sola in sas perfectas
Per virtute d'Ispiritu inserradu
Esser deviat, et posca ad sas neglectas
Leges, naschidu desit lughe et forma
Pro qu' esseret ad nois caminu et norma.

206.

Et pro purgare cuddu antigu errore,
Qui in domo de Sathan nos haviat postu,
Querfisit Christu nostru Redemptore
Redimernos, cum tantu et tale costu.
Oh! pena mortalissima, ah! dolore
Ad ogn'ater terribile prepostu,
Confictu cum tres jaos in unu palu
Pro su generu humanu trist'et malu!

207.

Ai custu dês de tanta tirannia,
Su die de su judiciu Universale,
Istrictu contu dare in cumpagnia
De Diocletianu ispirit' infernale,
Et haver tentu coro et phantasia
In brunzu, in pedra, in cosa bestiale,
Connoscher dês ad s'hora, et penitentia
Haver logu non dêt in sa sententia.

208.

Connoscher dês ad s' hora, si Gavinu
Junctamente cum nois simus errados,
O fusti tue poveru, et meschinu
D'ogni virtude, et riccu de peccados,
Pero pro custu Re chiaru et Divinu,
Sos duos stamns sempre adparizzados;
Benzant penas, flagellos, benzat morte
Qui tot' est triumphu, gosu, vida, et sorte.

209.

Restat Barbaru un' hora pensativu
Senza risposta discurrende in mente
De sos martirios su pius sensitivu,
Qui mai s' esseret dadu infra sa gente,
Pro qui restaret un' exemplu vivu,
Ad sos tempos de venner et presente;
Timorizende cum cust' ischermentu
Ogni conversu in Christu intendimentu.

210.

Mas da' s' atera parte li naschiât
Unu timore in coro pius gagliardu,
Qui mesu foras d' ipse lu teniat
In narrer, et provider, fluxu , et tardu:
Et fuit qui veramente connoschiât,
Qui su narrer de Brothu acutu dardu

In coro de su Pobulu istetisit,
Qui totu lu alterait, et lu movisit.

211.

Et vidende sa gente subvertida,
Si non fuit tota sa mazore parte;
Cum d' unu bassu murmuru, et grida
Qui solet nascher in Bellona, et Marte
Istende in dubiu de sa propria vida,
Bisonzu li faghiat ingegnu et arte
Postu in tales intrigos non ischiat
De custos ite fagher si podiat.

212.

Considerende ja qui fuint istados
Cum grandissimas penas, et dolores
Crudelissimamente turmentados
Cum mai plus vistu istratiu, et cum rigores,
Et qui liberamente siant torrados
De posca in man' ad sos tormentadores,
Dubitat qu'ad sa morte certamente
Miraculos non mustrent ad sa gente.

213.

O qui Christu da morte, et da flagellos
Timet, qui non los liberet su tristu,
Et qui totu su Pobulu ribellos
Si mustrent, aderende ad Jesu Christu.
Et qui contr' ipse ispadas et martellos
Non si alzent, cust' ispantu havende vistu:
Et gasi infra Caribdi, et Scilla inclusu
Si agatat postu, timidu, et confusu.

214.

Mas pro evitare tota suspicione,
Qui sili offerit, vidende alterada
Sa gente, mudat prestu d'intentione
De sa crudele morte machinada,
Et queret cum sa propria passione
S' una, et s' atera testa decollada
Restet, quale restait sa de Gavinu
In su matessi logu aspru, marinu.

215.

Et qui pro nudrimentu, esca et pastura
De pisches siant bettados in su mare
Da' cudda propria rocca, et propria altura;
Qui fectint a Gavinu trabuccare

Sa sententia reducta in iscriptura
Ad sos martires sanctos publicare
Fecit BARBARU, et cudda bene intesa
Lis adportat perpetua contentesa.

216.

Los integrat a' cuddos Carniceris
Ministros qui execùtent sa sententia
Si movent, cust' intesu, pius lezeris,
Que in fact' augellu astore cum violentia,
Et ligant cussos veros cavaglieris
Cum tanta rabia, furia et impatientia,
Qui lis rumpit sos brazzos sa istrictura
De su pesu de ferru, et corda dura.

217.

Los portant ad su logu destinadu
Pro fagher de sos membros divisione,
Su vider s' unu et s' ateru tractadu
Cum tantu vituperiu, et derisione,
Ben' hit com' esser coro aspr' atarzadu,
Qui de pura pietade, et cumpassione
Non rumperet, videndelos ad s' hora,
Et como immaginendelos ancora!

218.

De Gavinu sa sancta in cumpagnia
Anima andesit sempre cum sos Sanctos
Martires, et andende un' harmonia
In Chelu si sentiat cum varios cantos.
Ogni coro fidele, ogn' alma pia
Considerait sos movimientos tantos,
Qui fecit in sos Chelos s'altu lumen
Pius de su natural' usu, et costumen.

219.

Immaginetsi como su Lectore
Su propriu istadu de sos Sanctos mios,
Qui accesos totu de divin' amore,
Non stimant pena, morte, nen disvios:
Et eo minimu verme peccadore,
Qui meritant de fagher largos rios
Custos ojos ogn' hora, non mi accendo,
De te, Factore meu, nen s'alm' emendo?

220.

Currant da custos ojos sambinosas
Lacrimas, nadas da coro constrictu,

Solu in sas cosas tuas maravigliosas
Insatiabile siat custu appetitu:
Gira sas lughes tuas sempre piedosas,
Et rumpe, et scalda custu duru et frittu
Coro, qui vanizende multos annos
Passait gosende de sos proprios dannos.

221.

Una scintilla tua pone in su coro,
Qui resolvat su giazzu, et in cald' estivu
Vengat ad refirmare pius de s'oro,
Et cumparzat ardente, puru, et vivu,
Et mentres qui ti celebros, et ti adoro
D'ogni mundanu querrer fâmi privu.
Tenende sos penseris sublevados
In custos sanctos mios martirizados.

222.

Pervenint ad sa rocca alta, et dicioso,
In ue Gavinu istetìt decolladu;
Quircant sa propria parte sambenosa,
Qui gasi per sententia est declaradu:
Brothu cum cara pallida animosa
Pedit ad su qui li stat per costadu,
Narende, in ue est su logu qui saltait
Sa testa de Gavinu, in ue passait?

223.

Narende custu, una larga pischina
De samben congeladu agatant piena
In s'alta rocca adprobe ad sa marina.
Qui tirant sos buttios fin'ad sa rena;
Inie si firmat s' isquadra ferina,
Pro dare effectum ad sa mortale pena:
In viderla, sos Sanctos si prostrant
In terra, e' in rughe sas manos alzaint.

224.

S' unu adprobe de s'ateru si posit
Pro dipartire cudda colligantia
Ue su corpus cum s'alma, et Brothu exposit
Su qui intendiat in custa prompt'andantia,
Narende, Altu Signore, si ti rosit
Piedade, tanta de sa prima errantia,
Qui cum tormentu tantu, ahime! querfistis
Morrer pro nois, qui perdidos nos vistis!

225.

Qui ti môas como, prego, a cumpassione
De custa gente perdita, et confusa.
Qui cegos de discursu in perditione
Caminant ad su Regnu de Aretusa;
Dalis lughe, caminu, et cognitione,
De te sa grafia tua lis siat infusa
Qui restet su sanctissimu Pabadu
Triumphante sempre in pacificu istadu.

226.

Et qu' in su Regnu Sardu, et Turritana
Per gratia tua, Signore, andet creschende
Sa vera , et sancta fide christiana
Ogni fuscu intellectu illuminende:
Et destructa sa heretica et pagana
Scisma, o s'errore ipsoro connoschende
Ti adorent sempre, et muda Tue pietosu
Su judiciu contr' ipsos righorusu.

227.

Et ad nois qui pius forles, et constantes
In sufferrer tormentos, et dolores,
D' iscogliu ad sa fortuna, et de diamantes,
Preservados dae Te cum milli amores
Semus istados, vidansi abbondantes
Sas gratias tuas, pius qu' in campu fiores:
In cust' extremu punctu doloridu
Desizadu da nois tant', et querfidu.

228.

De custas almas nostras hapas cura,
Passadu custu pagu de agonia,
Acceptalas, Signore, in sa chiarura
Celeste cum sas tuas in cumpagnia,
Sos duos s' abbrazzant cum pius istrictura
Qui non s' istringhet s' hedra in pedra bia,
S' ater respondet, siat. ... , et in narrer custu
L' ispiccant sas cabitas da' s' imbustu.

229.

De samben cum grandissim' effusione
Rusint in terra, et sos ojos alzados
In sa solare isphera, et regione,
In ue tenent sos premios balanzados;
Et pro qui sa sententia, executione
Hapet de totu, in mare sunt bettados
De s'alta rocca propria, de ue Gavinu
Stetit bettadu in su littu marinu.

230.

Cust' in Sardigna istetit temporada,
Qui pro sa fide sancta Christiana
Sa carre de sos servos tormentada
De Christu, istetit da gente pagana ,
Et qui bettada in fogu, et quie tagliada
In pezzos da' sa furia aspra romana,
Su nomen de sos quales iscrier non querzo
Qu' ad s' antigu Condaghe mi referzo.

231.

Plus claru , plus lughidu, et luminosu
Fagher in sa fenestra mai si visit
Nen cum pius trizzas brundas amphanosu
Appollo in su ponente mai currisit,
Quant' in custu notadu die festosu,
Qui s'allegra vennida presentisit
In Chelu de sas tres iscioltas almas
De sa cura terrena anxiosa, et salmas.

232.

Quale solet inantis de tronare
Vidersi s'aere tota lampeggiende,
Qui resiter non podet nen mirare
Sa vista, et si la mirat offendende,
Gasi propriu sas almas involare
In sos chelos si visint fiammegende,
In modu d' unas nues qui s' abberiant,
Et sas fiammas sas vistas offendiant.

233.

De tota sa celeste Jerarchia
Si sentiat claramente unu concertu,
D'una suave, et dulce melodia
Pro custu sacrificiu in Chelu offertu;
Cum piaghere infinitu, et allegria
Las recivisint ad s' eternu mertu
Per manos de sos Anghelos portadas
In sas eternas sedias preparadas.

234.

De tantos movimientos qui vidisint
Foras de naturale ordine, et pactu.
Oh! quantas almas perdidas cretisint
In cuddu Trinu Deu qui nos hat factu!
Oh! quantas poscas si nde convertisint
Pro relatione de s'ispantos' actu!

Qui da crudos, et perfidos paganos
Si fectint devotissimos Christianos.

235.

De Octobre ad vinti, et pius quimbe, su die
Gavinu cum sos duos decapitados
Istetint in Balài, et da inie
Ad sas undas, et pisches consignados.
Su coro mi consumit quale nie
Tocca da' sole in montes elevados,
Quand' ogn' annu renfrisco sa memoria
De su martiriu vostru, et de sa gloria!

236.

Pro cussu dai su Regnu est nominadu
Su die de sa memoria de Gavinu,
Pro qui su primu istetit decolladu,
Qui non sos duos in su litus marinu,
Mas da s'Ecclesia posca est celebradu
Pro sos martires tres, nen su pristinu
Martiriu, de horas pagas hat plus testa,
Mas equalmente de tot' est sa festa.

237.

Et comente sa terra si cobrisit
D' obscuru mantu, certos religiosos
Ad sos quales s' Altissimu accendisit
Sas mentes de desizos virtuosos
In sos coros lis posit, et querfisit,
Qui quircarent sos corpos gloriosos;
Et gasi cum sas tenebras andaint.
In ue sos tres su die decapitaint.

238.

Jompidos in sa vota de su mare
Sas testas, et sos corpos decollados
Los agatant inie postos umpare,
Ne da pisches offesos, nen bagnados.
Oh miraculu grande de notare!
Oh logos in su Regnu avventurados,
In ue reposant custos corpos Sanctos,
Qu' ad sos devotos mustrant signos tantos!

239.

Restaint plenos d' ispantu , et istupore
Custos servos de Deu, et ogni cura
Posint accesos de divinu amore,
In dare a' custos Corpos sepoltura;

Et sa matessi nocte cum timore
De n' esser vistos, sa codina dura
In certu logu cum piccos rumpisint,
Et sos Martires tres intro pongisint.

240.

In' ue narant qui stetint octighentos
Annos, in sa codina sepellidos
Segundu sos de plus referimentos
In justu, et veru contu reduidos;
Et da sa gente ad s' hora in pagu tentos
Fuint custos corpos Sanctos reveridos,
Si bene lis mustraint maravigliosas
Da tenerlos in meda affectu, et cosas.

241.

Fin' ad su tempus, fin' ad sa venida
De cuddu de ambos logos elegidu
Juighe bonu appelladu COMIDA,
De lepra tormentadu, et consumidu;
Homin' intesu, et d'una sancta vida,
Ad su qual' ischidadu, que dormidu
De Gavinu adparisit sa persone
Tota movida d' ipse a cumpassione.

242.

Narendeli si queres esser sanu
De cussu tantu forte qu' has ad dossu
Incurabile male quotidianu,
Qui ti rodit sas pulpas fin' ad s' ossu,
Cònstrue unu Templu infra su mont' et planu
Et siat da' te su primu colpu mossu,
Et porta cuddos corpos da Balàì,
Qui in sa codina sunt tempus assai.

243.

In Turres est su logu, in Mont' Agellu
In ue sa Sancta Ecclesia des fundare,
Et designada, et factu su modellu,
Cominza de presente ad fabricare
Et factu custu unu sepulcru bellu
Per Gavinu, per Brothu, et Januare
Dês fagher subterraneu in mesu d' ipsa,
In ue semper si celebret sa Missa.

244.

Fetit Comita totu, su qui nait
Cuddu Martire Sanctu in sa visione,

Et unu riccu Templu in altu alzait,
S' homine justu sempr' in oratione,
Et constructa sa Ecclesia ivi portait
Sos Corpos tres cum grande devotione
Comente, et d' ite modu, et cum qual' arte
In sa segunda narrer depo Parte.

245.

Erectu custu Templu inie translados
Sos sanctissimos Corpos cominzaint
Miraculos ad fagher segnalados,
Qu' ad multos de sa morte liberaint;
Et sos infirmos tempus meda istados
De incurabile male los sanaint
Comente intender dezis in sa vida
De su justu, et sanct' homine Comida.

246.

Et custu narrer poto in veridade
Qu' in sa crudele infirmitate mia
De coro Bos pregai, et pro pietade
Pro me pregastis totu in cumpagnia
A' cudda Unica et Trina Maiestade,
Et gasi mi allargait sa curta via
Pro qu' ismenare cudda mal' intesa
Etade, et pianga quantu l'hapo offesa.

247.

Ad bois, Martires mios, ad bois curgisi
Ad bois de custas Turres defensores,
Et cum s' adjudu bostru mi sentisi
Torradu in sos pristinos mios vigores;
Voltos versu de me sempre vos visi
Pietosos ad sos tantos mios clamores,
Et gasi invoco ad bois sempre in sas mias
Fortunas de sossegu, et tribulias.

248.

Subta s'amparu bostru et protectione
Vivet su Regnu, et pius su Turritanu
Ovile, qui cum tanta devotione
Iscurrit cum su tempus ogni pianu.
Qual' in Sardign' est hoe viva persone,
Qui cum sa mente, et cum su coro sanu
Vos preghet, qui non siant subit' intesas,
Et da bois consoladas, et difesas?

249.

Finissimos carbuncos allummados
In Chel', et in cust' Ecclesia sepellidos,
Veros Padronos nostros, e Advogados
Da' nois cum puru coro reveridos;
Prego da' bois difesos, et bardados
Su Regnu Sardu siat, et circuidos;
Et recurzat ogn' alma ad bois Padronos,
Qu' ottenner dêt de sos fallos perdonos.

250.

Recurzat ogni coro attribuladu
A' custos tres in Chelu triumphadores,
Qui dêt esser in breve acconsoladu,
Mediante custos sanctos Protectores;
Visitent cuddu Templu edificadu
Cum tant' industria, costu, art', et primores
Cum purgadas intradas, et conscientias,
Qu' infinitas balanzant Indulgentias.

FINIS.